



BOSNA I HERCEGOVINA
VIJEĆE MINISTARA
Generalno tajništvo

Broj: 05-50-1-3400/12
Sarajevo, 15.1.2013. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 16.01.2013

Organizaciona jedinica	Klasifikaciona oznaka	Broj	Broj priloga
01-50-1-15-36/12			

PARLAMENTARNA SKUPŠTINA BiH

- Zastupnički dom -

SARAJEVO

PREDMET: Odgovor na zastupničko pitanje – dostavlja se

Vijeće ministara Bosne i Hercegovine, na 34. sjednici održanoj 11.1.2013. godine, utvrdilo je Odgovor na zastupničko pitanje koje je postavio Ante Domazet, zastupnik u Zastupničkom domu Parlamentarne skupštine Bosne i Hercegovine.

U pravitku prosljeđujemo Odgovor radi njegovog dostavljanja zastupniku.

S poštovanjem,



GENERALNI TAJNIK
Zvonimir Kutleša



BOSNA I HERCEGOVINA
VIJEĆE MINISTARA

Broj: 05-50-1-3400/12
Sarajevo, 11.1.2013. godine

Anto Domazet, poslanik u Predstavničkom domu Parlamentarne skupštine Bosne i Hercegovine, na 36. sjednici Predstavničkog doma održanoj 22.11.2012. godine, postavio je sljedeće poslaničko pitanje: Šta Vijeće ministara BiH i Ministarstvo vanjske trgovine i ekonomskih odnosa BiH kane poduzeti, kako bi stavili u fokus i promovirali izvoz BiH u Rusku Federaciju i unaprijedili ekonomske odnose BiH i Ruske Federacije?"

Na postavljeno pitanje, Vijeće ministara Bosne i Hercegovine je na 34. sjednici održanoj 11.01.2013. godine, utvrdilo sljedeći

ODGOVOR

Ministarstvo spoljne trgovine i ekonomskih odnosa BiH je u cilju unapređenja izvoza BiH u Rusku Federaciju, kao i ukupnih ekonomskih odnosa dviju zemalja, više puta od 2007. godine, predlagalo ruskoj strani potpisivanje sporazuma o preferencijalnoj trgovini. Na sastanku kopredsjedavajućih Međuvladine bosanskohercegovačko-ruske komisije za trgovinu i ekonomsku saradnju održanom 11.11.2011. godine, kada je bh. strana ponovo pokrenula ovo pitanje, ruska strana je obrazložila da je zaključivanje sporazuma o slobodnoj ili preferencijalnoj trgovini u nadležnosti Carinske unije Ruske Federacije, Kazahstana i Bjelorusije, te da s toga Ruska Federacija ne može samostalno odlučivati.

Prema informacijama kojima raspolaže ovo Ministarstvo, Republika Srbija je zaključila Sporazum o slobodnoj trgovini sa Rusijom 2000. godine i to je jedina država u Evropi, pored nekih članica Zajednice nezavisnih država (ZND), koja ima potpisan ovakav sporazum sa Rusijom.

Zaključivanje svakog međunarodnog ugovora pa i Ugovora o slobodnoj ili preferencijalnoj trgovini pretpostavlja postojanje interesa obje strane. Dodatno, ne smije se izgubiti iz vida da ovakav sporazum podrazumijeva bescarinski/preferencijalni izvoz i uvoz

(član XXIV GATT 1994), što znači identičan ili čak i povoljniji status proizvoda druge strane na bh. tržištu. Ovo Ministarstvo ima zadatak da vodi računa o interesima cjelokupne privrede (bilo izvozno ili uvezno orijentisanom), koji nerijetko znaju biti suprotni do isključivosti, te se u tom smislu ne smije zanemariti kompleksnost odluka koje bi u ovom slučaju trebalo donijeti. Konačno, zahtjevi za zaštitom domaće proizvodnje širom BiH, u direktnoj su suprotnosti sa konceptom slobodne trgovine.

Kada se govori o izvozu BiH u Rusku Federaciju, promjena preferencijalnog režima Ruske Federacije prema trećim zemljama izvan carinske unije, značajno je otežala poziciju BiH. Od 1.1.2010.godine na robu iz BiH prilikom uvoza u jedinstveni carinski prostor Unije primjenjuje se 75% MFN carinske stope, dok se ranije primjenjivala nulta carinska stopa bilateralno od Ruske Federacije (BiH je iz statusa nerazvijene zemlje prešla u status zemlje u razvoju). Nezavisno od toga, podaci o robnoj razmjeni BiH sa Ruskom Federacijom ukazuju da je ona vrlo koncentrisana. Naime od ukupnog iznosa uvoza iz Ruske Federacije (oko 1,2 milijarde KM) preko 90% se odnosi na uvoz mineralnih goriva i ulja.

Imajući u vidu s druge strane niz povoljnih činjenica (bivši SSSR bio je jedan od vodećih spoljnotrgovinskih partnera SFRJ, u BiH posluje značajan broj ruskih kompanija što otvara mogućnosti za razvoj vezanih trgovinskih aranžmana, veličina tržišta Ruske Federacije predstavlja značajan potencijala za plasman robe i dr.) ovo Ministarstvo nije zanemarilo tržište Ruske Federacije, već je nastojalo i nastoji unaprijediti izvoz BiH u Rusku Federaciju. Na osnovu podataka koje dobiva od privrednih subjekata u BiH zainteresovanih za poslovanje u Ruskoj Federaciji i diplomatskih predstavništava dviju zemalja, Ministarstvo nastoji da u saradnji sa nadležnim institucijama Ruske Federacije pronade najbolja rješenja, kako bi se unaprijedio izvoz BiH u Rusku Federaciju.

Već duže vrijeme pokušavamo organizovati sjednicu Međuvladine bosanskohercegovačko-ruske komisije za trgovinu i ekonomsku saradnju, na kojoj bi bila razmatrana ekonomska saradnja dviju zemalja i mogućnosti za njeno unapređenje. Međutim, održavanje sjednice Međuvladine komisije ne zavisi samo od bh. strane, već i od druge strane. Do sada smo uspjeli organizovati pomenuti pripremni sastanak kopredsjedavajućih Međuvladine komisije. Nedavno smo obavješteni o koopredsjedavajućem sa ruske strane, te očekujemo da ćemo uskoro primiti odgovor ruske strane i u vezi prijedloga termina održavanja sjednice. Naša su očekivanja da bi se ova sjednica mogla održati tokom 2013. godine. Oko ovih i drugih aktivnosti, Ministarstvo je u stalnom kontaktu sa Ambasdom Ruske Federacije u BiH, a takođe radi i na koordinaciji aktivnosti sa institucijama unutar BiH.

Uskoro se očekuje intenziviranje aktivnosti oko ispitivanja mogućnosti za zajednički nastup na trećim tržištima zemalja regiona, a tržište Ruske Federacije je svakako u fokusu interesovanja BiH. U tom smislu već su neformalno poslali signali pojedinim institucijama u Srbiji o našoj zainteresovanosti za zajednički nastup na ruskom tržištu, naročito kada su u pitanju poljoprivredni proizvodi.